




# DANGADANG

Ispesyal nga Isyu 2018

Tawen 32 Bilang 7

P10.00

IPASA NO MABASA



## PRAYMER NAIPAPAN ITI ELEKSYON 2019

Inton Mayo 2019, maangay manen ti eleksyon para kadagiti senador ken lokal nga opisyaes. Maimatangan to manen ti nagugurdo a panagkampanya, dagiti miting de abanse, bilbord ken polyeto, karkari, pinnilkatan ti pammadakes, gimik iti pangay-ayo, panaggatang ti butos, pulitikal a ranggas, ken dadduma pay.

Maangay ti eleksyon 2019 iti tengnga ti umir-irteng a tiraniko ken pasista a panagturay ti napartak a maisinsina a rehimen a US-Duterte ken ti pumigpisa a panaglapan ti nalawa nga umili tapno mapatakyas daytoy. Mapasamak met ti eleksyon iti tengnga ti kumarkaro pay a krisis iti ekonomya ken pulitika ti pagilian.

Iti kina-desperado a makapagtalinaed iti poder, nakaro ti panagpakpakumbaba ken kinaaso-aso ti rehimen a Duterte iti dua nga imperyalista a bileg – ti US ken China. Bayat nga agtultuloy ti kontrol ken panagdiktat ti imperyalista a US iti ekonomya ken pulitika ti Pilipinas, pappapigsaen met ti imperyalista a China ti bukod a pang-ekonomya ken pampulitika

nga impluwensya iti pagilian. Takrot a binaybay-an ni Duterte ti panagkontrol ti China iti Spratly Islands, ken iti kasta ket iti intero a South China Sea, iti bangir ti desisyon ti internasyunal a korte nga Arbitral Tribunal a ti Spratly Islands ken dadduma pay a paset ti South China Sea ket paset ti teritoryo ti Pilipinas. Saan a linapdan ni Duterte ti panangitakder ti China kadagiti base militar idia Spratly Islands. Ti naamo a karnero a panag-asta ni Duterte iti sango ti arogansya ti China ket kasukat ti dadakkel a panagpuonan dagiti kapitalista a Tsino ken dakkel a pautang ti China iti pagilian a pangpondo ni Duterte iti ambisyoso a programa a Build, Build, Build. Kabayatan na, agtultuloy met a pappapigsaen ti US ti presensya militar na iti pagilian ken ti dominasyon na iti AFP, tapno maisigurado ti agtultuloy a panangusar ti US iti Pilipinas para iti estratehiko nga interes militar na iti intero nga Asya. Ti Pilipinas ket adda itatta iti tengnga ti peggad a maipit iti dua nga agbangbanga a superpower.

## LINAON:

1. Ania ti Galad ti Reaksyunaryo nga Eleksyon?
2. Demokratiko a Rebolusyon ti Umili ti Solusyon Kadagiti Basaran a Problema ti Umili
3. No Burgis ken Reaksyunaryo ti Eleksyon, Apay A Kasapulan A Makipaset Tayo Ditoy?
4. Kasano Tayo Nga Ususaren ti Rebolusyonaryo A Duanan A Taktika Iti Pannakisango iti Eleksyon?
5. Ania Ti Sistema A Party-list?
6. Ania Dagiti Rebbengen Iti Panawen ti Eleksyon?



Ti *Dangadang* ket rebolusyonaryo a pagiwarnak iti Amianan-Laud a Luzon iti tarabay ti PARTIDO KOMUNISTA ti PILIPINAS. Maipablaak ditoy dagiti damdamag kadagiti aksyon ti Bagong Hukbong Bayan ken *dangadang* ti umili kasta met ti panagamiris kadagiti isyu a pakaseknan ti umili.

Silulukat ti *Dangadang* iti aniaman a saludsod, dillaw, singasing, koresponsal ken pangkultura a parnuay tapno mapadur-as ti linaon na.


Pagtitinnulongan tayo a padur-asen ti *Dangadang*. Ti sangapulo a piso a presyo ti pagiwarnak ket bassit a donasyon tapno suportaran ti agtultuloy a pannakairuar na.

Nakaro ti panagsagaba ti umili a Pilipino iti napartak a kumarkaro a krisis pang-ekonomya ken pangpulitika iti pagilian. Iti diktar ti imperyalismo a US, agtultuloy nga ipatpatungpal ti rehimen ni Duterte dagiti neoliberal a patakaran a pang-ekonomya, a mangmangted ti dumakdakkal a pabor kadagiti gangannaet ken lokal a dadakkal a kapitalista tapno manggamrud iti kinabaknang ken ekonomya ti pagilian. Tapno makapataud ti pangbayad iti utang kadagiti imperyalista a bangko, iti diktar dagitoy met laeng a bangko ket ipatpatungpal ti rehimen dagiti nayon a buwis babaen iti linteg a TRAIN. Lallalo a nailumlom ti nalawa nga umili iti nakaro a kinarigat gapu iti napartak a pananggato ti presyo dagiti gagatangen ken serbisyo a resulta ti panangipatungpal ti TRAIN. Maisarunonto pay ti panangipakat ti linteg a TRAIN 2 a mangipatungpal kadagiti nayon pay a baro a buwis ken manamnama a mangpakaro pay manen iti rigat a laklak-amen ti umili.

Iti bangir na, nakabasbassit ti ngimmatoan ti sweldo dagiti mangmangged bayat nga agtaltalinaed a kontraktwal ti kaaduan. Agtaltalinaed nga awan ti maipatpatungpal a pudno a reporma nga agraryo isunga agtaltalinaed met nga awanan wenno kurang ti bukod a daga ti kaaduan a mannalon. Dagiti mannalon a nangipursige a mang-okupar ken mangsukay kadagiti nabaybay-an a kadagaan dagiti apo't daga ken ti reaksyunaryo a gubyrno tapno maaddaan ti nayon a taraon ken pagbiagan ket naranggas a papanawen wenno patayen dagiti militar ken armado a tao-an dagiti apo't daga kas iti napasamak a panag-masaker iti siyam a nakurapay a mannalon idi Oktubre 2019 sadiay Sagay City, Negros Occidental. Agtultuloy met a maag-agaw ti anestrak a daga dagiti nailian a minoritya a Lumad ken Moro idiy Mindanao, Igorot iti Cordillera, Aeta iti Pampanga ken dadduma pay para kadagiti igante a gangannaet ken lokal a kumpanya ti minas ken enerhiya, plantasyon ti pang-eksport a produkto ken proyekto nga imprastruktura nga agserbi met laeng kadagiti dadakkal a negosyo. Dagiti sumupiat ken lumaban ket ma-militarisa ken maranggasan kas iti agtultuloy a pammapatay kadagiti lider ti Lumad. Kadagiti syudad, agsinnumbangir dagiti maisaysayangkat a naranggas a panag-demolis kadagiti komunidad dagiti nakurapay nga umili iti syudad, tapno nawaya met laeng a maitakder dagiti pasdek ken negosyo dagiti dadakkal a kapitalista.

Ti krisis iti ekonomya ken kabiagan ket lalo a mangisina iti rehimen a Duterte iti umili ken mangibunga iti nauneg a krisis iti pulitika na daytoy. Tapno maprotektaran ti interes dagiti gangannaet ken lokal a kapitalista a negosyante,





kasta met dagiti apo't daga, ken tapno mapatalinaed ti napigsa a panagturay na, lallalo nga agsangsanggir ni Duterte iti panag-aramat ti terorismo ti estado no sadinno a pag-arien na ti panagaligaget ken pammutbuteng. Rinibribo nga umili ti mabikbiktima iti gubat nga Oplan Kapayapaan, martial law idiy Mindanao, Oplan Tokhang ken gubat a kontra kadagiti Moro.

Ubbaw ti arapaap ti rehimen a US-Duterte a marebbek ti armado a rebolusyonaryo a tignayan sakbay ti tengnga ti tawen 2019 (nga inyatras na manipud iti orihinal a target a sakbay ti gibus ti tawen 2018). Iti kina-desperado a magun-od daytoy agmauyong nga arapaap, karkaro a ranggas ti iyab-ablat ti rehimen iti umili. Tapno magun-od ti target, ad-adda a mapadpadakkel ti AFP, PNP, CAFGU ken dadduma pay a para-militar a grupo; ken agut-utang ti rehimen kadagiti nayon a moderno a ramit a panggubat a kas kadagiti fighter jet, attack helicopter, armored personnel carrier (APC), howitzer, drone ken dadduma pay nga aggatgatad iti minilyon a dolyar. Ung-ungawen laeng ti pasista a rehimen ti dumakdakkel a pondo a rumbeng a mausar kadagiti serbisyo

publiko. Nakaro pay, ti nakadakdakkel nga utang iti panangirussuat ken panangsustinir ti narugit ken nadara a gubat ni Duterte ket maipabaklay kadagiti marigrigat nga agbaybayad ti buwis.

Inaprobaran ti joint session ti Senado ken Kongreso ti maysa tawen manen nga ekstensyon ti Martial Law sadiay Mindanao iti tawen 2019. Nagdeklara met ti "State of Lawlessness" kadagiti rehiyon ti Bicol ken Eastern Visayas ken isla ti Negros. Awan ti naidumaan na daytoy iti Martial Law. Ikagkagumaan pay ti rehimen ni Duterte nga agpartuat kadagiti rason tapno maideklara ti Martial Law iti intero a pagilian kas iti panangiwaragawag iti "Red October" a pakana kano ti PKP iti pannakikumplot kadagiti ligal nga organisasyon ti masa, dagiti unibersidad idiy Metro Manila, mano a pulitiko ken ti Liberal Party, tapno patakyasen ni Duterte.

Nabayagen a pangpanggepen ni Duterte ken ti AFP a maipatungpal ti absoluto a panagturay ti militar iti pagilian. Iti kasta, mas nawaya ti rehimen a mangipatungpal kadagiti kontra-umili ken pabor iti agturturay a dasig ken imperyalista a programa ken proyekto. Iti aktwal, ti nakaro a militarisasyon ken terorismo a maiyab-ablat iti intero a pagilian ken ti panagpwesto dagiti retirado a heneral iti nganngani amin nga ahensya ti reaksyunaryo a guberno ket pakakitaan nga agraraira ti maysa a Martial Law iti pagilian, uray saan pay a pormal a naideklara daytoy. Iti naisayangkat nga International People's Tribunal idiy Belgium itay nabiit, nakasoan ni Duterte ken President Donald Trump ti US a nakabasol kadagiti nasaknap a panaglabsing iti karbengan-tao dagiti umili a Pilipino.





Paparpartaken ti rehimen a Duterte a maipatungpal dagiti kidkiddawen na a panagbalbaliw iti konstitusyon ti pagilian wenno ti “charter change” tapno nawaya a maipatungpal dagiti maka-imperyalista a patakaran iti ekonomya ken kasta met ti arapaap na a maitakder ti pederal a gubyrno a mangkonsolida iti diktadura a turay na. Tapno maiyaramid daytoy, kasapulan nga isigurado ni Duterte a mangabak ti kaaduan kadagiti tao-an na iti Senado, Kongreso ken lokal a gubyrno iti umay nga eleksyon inton Mayo 2019.

## **ANIA TI GALAD TI REAKSYUNARYO NGA ELEKSYON?**



Ti burges nga eleksyon ket nadara, naranggas, ken manangallilaw. Nakaro ti panagriribal dagiti reaksyonaryo a dasig aglalo no eleksyon. Agpipinnadakes, agsisinnaur ken agpipinnatay da. Iti sao, kunam la no agpayso da a napudno nga agserbi kadagiti umili. Iti sanganan ti masa, agiwaras da iti kuarta ken arak, ikari da nga ited uray ti bulan, an-anusan da a makilamano iti uray narugit a dakulap, aginpapakumbaba a tumapog iti pitak ti talon, agkammet kano met a makipangan, agsala ti boom tarattarat, agkanta uray silang, ken dadduma pay dita a gimik ken

buladas. Kagiddan dagiti “nalukneng” a wagas, agusar da iti “natangken” – pammutbuteng ken panagranggas, kasta met ti panagsaur a dagdag-bawas iti bilang ti butos. Iti likudan dagiti nasam-it nga isem ken karkari, iti kaunggan ti puso da ket ti ambisyon da a makapagturay tapno ad-adda nga agpabaknang, saan a ti agserbi kadagiti umili.

Kalpasan ti tunggal eleksyon, nalpasen ti drama, maikkat dagiti maskara, rummuar ti pudno a rupa dagiti reaksyonaryo. Ti kadawyan a mangabak ket saan a dagiti imbutos ti kaaduan, no di ket dagiti nagsaur, dagiti makintengngel iti COMELEC, dagiti nanggatang iti butos ti umili. No adda man ti mangabak kadagiti progresibo a kandidato, manmano da laeng ken biktima da pay ti panagsaur, pammadakes, ken ranggas. Isu nga agtultuloy ti bulok a sistema ken marigrigat a biag ti masa. Awan ti pudno a panagbalbaliw. Masukat laeng ti drayber ngem isu latta a karag-karag ti lugan.

Iti uneg ti agdama a sistema a malakolonyal ken malapyudal, ti eleksyon ket reaksyonaryo. Daytoy ket agserserbi kadagiti agar-ari a dasig tapno maisigurado nga agtultuloy ti kontrol da iti ekonomya ken pulitika ti pagilian; a ti kayat a saoen ket agtultuloy ti panangidadanes ken pananggundaway da iti nalawa nga umili tapno masungbatan ti kinaagum da iti kinabaknang ken pampulitika a turay. Ti agtultuloy a kontrol dagiti agar-ari a dasig iti reaksyonaryo a gubyrno ti mangisigurado a dagiti linteg ken programa a maipatungpal ket kangrunaan nga agserbi iti panagpabaknang da ken ti amo da nga imperyalista.

Ti eleksyon iti agdama a sistema iti pagilian ket isaysayangkat ti nagkaykaysa a naindasigan a diktadura ti dadakkel a burgesya kumprador ken apo’t daga nga adda iti kontrol ken dominasyon ti imperyalismo a US. Isunga, ni kaanoman ket saan a mabalina magun-od iti eleksyon ti panangiyebkas iti pundo a pangngeddeng ti umili nga agpili iti maysa a dadaulo a pudno a mangitandudo iti nailian ken demokratiko nga interes ti umili.

Iti pangruar a buya, kasla nakawaywaya ti umili a maibutos ken mangibutos kadagiti maiparbeng a tattao a mangidaulo kaniada. Ngem iti esensya, ti agdama a burges nga eleksyon ket maysa a panagallilaw laeng iti umili tapno ipakita nga adda kano ti agraraira a demokrasya iti pagilian tayo. Ti ilusyon ti demokrasya ket parpartuaten da babaen iti kumpetisyon


dagiti reaksyunaryo a personalidad ken iti panangaw-awis iti boto dagiti umili. Ngem kabaliktad ti demokrasya, ti kinapudno na ket agkaykaysa dagiti reaksyunaryo laban iti umili ken malimlimitaran ti pagpilian ti mangidaulo kadagiti manangidadanes ken mananggundaya a burukrata. Awan ti pudno a demokrasya para iti umili. Ti agraraira ket maysa a burges a demokrasya gaputa kontrolado dagiti agar-ari a dasig ti burges nga eleksyon babaen iti kontrol da iti kwarta, burukrasya, reaksyunaryo a militar ken pulisya, simbaan ken linteg.

Iti kabuklan, dagiti koalision, partido ken kandidato a rumimrimbaw iti eleksyon ken aggangandat a mangtengngel kadagiti pwesto, manipud presidente, senador, kongresman inggana kadagiti lokal nga opisyal, ket reaksyunaryo. Isuda dagiti ahente iti pulitika dagiti dadakkel a kumprador burgesya, apo't daga ken imperyalista. Nalaka da laeng nga agibbat kadagiti populista ken repormista a pannaon ken agikari iti panangresolba kadagiti basaran a problema ti umili kas iti "palung-awen ti umili manipud iti nakaro a kinakurapay" wenna "gibusan ti nakaro a korapsyon iti gubyerno" iti panggep a mailimed ti naindasigan nga interes da. Dakkel a kinaulbod ti ibagbaga dagiti repormista a "ti balota ket demokratiko ken husto a dalan ti pannakidangadang tapno baliwan ti gimong".

Iti pakaistoryaan ti pagilian tayo, sipud pay idi ket napaneknekan nga awan serbi dagiti burges nga eleksyon para iti naruay nga umili. Manipud naitakder ti papet a republika, nagsisinnukat laeng iti turay dagiti mangibagbagi kadagiti dasig nga apo't daga ken dadakkel a burgesya kumprador a natulnog nga agserserbi iti ken instrumento ti imperyalismo a US.

Malaksid iti sumagmamano a makabayan ken progresibo a partido politikal, dagiti rumimrimbaw a partido pulitikal kas ti PDP-LABAN, Liberal Party (LP), Nationalist People's Coalition (NPC), Partido Federalng Pilipinas (PFP), Kilusang Bagong Lipunan (KBL), Nacionalista Party (NP), ken dadduma pay a partido a pangrehiyon ken pamprobinsya ket pasig a mangibagbagi iti ken bukbuklen dagiti agar-ari a dasig a papet ti imperyalismo a US. Gaputa awan ti dakkel a pagdumaan da, nakalaklaka laeng nga agakar-akar dagiti pulitiko manipud iti maysa a partido mapan iti sabali a partido.

Ti laeng pagdumaan dagitoy a partido ket no adda wenna awan iti puesto dagiti



kangrunaan a tao-an da. No nakatugaw iti trono, insigida da a bukbukodan ti turay ken agpabpabaknang bayat nga ar-aramiden da ti amin tapno maiwalin dagiti kasalisal a partido politikal. No awan iti trono, ar-aramiden da met ti amin tapno mapadakkel ti paset da iti turay ken makurakot a kinabaknang, kas ti panangbatikos iti adda iti poder ken panagtakder kas oposision tapno makarimbaw iti sumaruno nga eleksyon.

Gaputa dagiti ag-iinnagaw iti pwesto ket pasig a naggapu kadagiti agturturay a dasig, ti burges nga eleksyon ket maysa met a pamuspusan iti panangresolba kadagiti kontradiksyon iti baet da. Ngem gaputa lumiplipit ti pagin-innagawan da a bileg pampulitika ken pang-ekonomya, masansan a dumanon iti kinaranggas ti panagsalisal da tapno makatugaw iti pwesto. Malaksid iti pinnangatoan ti gatad ti kwarta a maiwaras kadagiti botante, kumarkaro ti garapal a panagsinnaur ken panagpinnatay.

Dagiti partido pulitikal dagiti agari-ari a dasig ket saan a partido pulitikal ti umili. Pakaibilangan dagitoy dagiti pulitikal a dinastiya, kas iti dinastiya a Duterte, Aquino-Cojuangco, Binay, Enrile, Estrada, Cayetano, Jalosjos, Marcos, Singson, Ortega, Dy, Estrella, Joson ken dadduma pay. Isunga kas iti dati, ti eleksyon 2019 ket mangipakpakita laeng iti nalabes a kinabulok ti agari-ari a sistema a pampulitika ken agserbi a wagas tapno





Sumagmamano kadagiti reaksyunaryo a pulitiko iti Ilocos ken Cordillera: Abra Vice-Governor Ronald Balaoas, Abra Governor Joy Bernos, Apayao Governor Elias Bulut, dati nga Ilocos Sur Chavit Singson ken Ilocos Sur Governor Ryan Singson

maitultuloy ti manangidadanes ken mananggundaway a mala-kolonyal ken mala-pyudal a sistema. No makalusot man a mangabak iti eleksyon iti sango ti nakaro a panagsaur ken pamerperdi, ti manmano a progresibo a kandidato ket saan a makarimbaw kadagiti reaksyunaryo a pampulitika a pwersa. Nalawag a ni kaanuman ket saan nga agbalin a solusyon ti reaksyunaryo nga eleksyon kadagiti basaran a problema ti umili a Pilipino nga imperyalismo, pyudalismo ken burukrata kapitalismo.

**DEMOKRATIKO A  
REBOLUSYON TI UMILI  
TI SOLUSYON KADAGITI  
BASARAN A PROBLEMA TI  
UMILI**

Ti nailian demokratiko a rebolusyon nga addaan sosyalista a masakbayan ti laeng solusyon tapno magun-od ti pudno a panagbalbaliw iti gimong a Pilipino. Kasapulan a rebbeken ti estado ti dadakkel a burgesya komprador, apo't daga ken imperyalismo a US babaen iti armado a rebolusyon tapno maibangon ti estado dagiti magungundawayan ken maidaddadanes nga umili. Iti uneg laeng ti demokratiko nga estado ti pagilian a maaddaan ti pudno a demokratiko nga eleksyon.

Iti nailian-demokratiko a rebolusyon, kangrunaan a maiyab-abante ti armado a pannakidangadang tapno marebbek ken maagaw ti bileg pampulitika manipud kadagiti reaksyunaryo nga agar-ari a dasig gaputa ni kaano man ket saan da a situtulnog nga isuko daytoy. Ngem napateg met laeng nga iyabante ti ligal a pannakidangadang kas sekundaryo a wagas ti pannakidangadang, a mangsupsuporta iti armado a pannakidangadang, ken maiyab-abante basar iti lumawlaw ken umir-irteng a rebolusyonaryo a tignayan ti umili iti intero a pagilian. Agtinnulong ti armado

ken ligal a wagas ti pannakidangadang iti panangiyabante ti rebolusyonaryo a tignayan.

Kadagiti ligal a porma ti dangadang, kangrunaan ken kapapatgan a maiyab-abante dagiti naparang a pannakidangadang masa a mangiruprupir kadagiti pampulitika ken pang-ekonomya a karbengan ken pag-imbagan ti umili. Maibilang met kadagiti sekundaryo a ligal a porma ti dangadang ti trabaho iti uneg dagiti reaksyonaryo nga organisasyon, institusyon ken proseso ken ti elektoral wenno parlamentaryo a pannakidangadang.

**NO BURGIS KEN  
REAKSYUNARYO TI  
ELEKSYON, APAY A  
KASAPULAN A MAKIPASET  
TAYO DITAY?**

Numanpay maysa laeng kadagiti sekundaryo a porma ti ligal a pannakidangadang, napateg ti elektoral wenno parlamentaryo a pannakidangadang iti panangiyabante ti nailian-demokratiko a tignayan. Maysa a napateg a ramen ti panangpabagsakiti bulokken agbugbugdot a sistema ket ti panagtignay iti uneg mismo ti tay-ak dagiti reaksyunaryo. Napateg ti panangiyabante ti elektoral a pannakidangadang tapno madanon ti nalawlaw a masa, saan a mabaybay-an a mabukudan dagiti reaksyonaryo daytoy a tay-ak ken maibutaktak ti kinabulok ti agari-ari a sistema ken mapakapsot daytoy manipud iti uneg, kas paset iti naan-anay a pannakaburak daytoy. Napateg a manipud iti uneg ti agar-ari a sistema ket maibutaktak ken malabanan ti kabusor.

Kas maysa a tay-ak ti labanan, mabalin a makagun-od ti masa ti mano a bentahe bayat a birbiraen iti pulitika dagiti napeklan a kabusor da. Ti eleksyon ket mabalin a gundawayan para iti nalawa a propaganda ken edukasyon, panag-organisa ken panangpatignay iti umili. Mabalin met nga agipangabak kadagiti progresibo ken



maka-umili a kandidato a mang-awit iti laban ti umili iti uneg ti reaksyonaryo nga estado.

Ti Partido Komunista ng Pilipinas (PKP), Bagong Hukbong Bayan (BHB) ken dagiti rebolusyonaryo nga organisasyon ti masa a kas iti PKM, KM, Makibaka, CPDF ken dadduma pay nga alyado nga organisasyon ti NDF, kas ilegal nga organisasyon ken saan a mangbigbig iti eleksyon kas dalan ti panagbalbaliw ti gimong, ket saan a makipaspaset iti reaksyunaryo nga eleksyon. Malaksid pay a dagiti linteg ti sarswela ti panang-allilaw ket ikedkeddeng ti agar-ari a dasig, ti mismo a kontra-rebolusyonaryo a panaganup ti reaksyonaryo nga estado iti Partido ken Hukbo ket mangiparpariten kadagitoy a makipaset iti daytoy a proseso.

Ngem dagiti ligal a progresibo a pwersa ken organisasyon ket kasapulan nga agpursige iti panangiyabante ti elektoral a pannakidangadang basar iti lumawlaw ken umir-irteng a rebolusyonaryo a tignayan ti umili iti kaaw-awayan ken syudad ken iti naunday a gubat ti umili iti kabuklan.

Iti kabuklan, saan tayo a liplipatan a numanpay napateg ti elektoral a pannakidangadang, daytoy ket paset laeng ti rebolusyonaryo a tignayan ti umili, ken iti kabuklan, ti naunday a gubat ti umili ti baro a demokratiko a rebolusyon.

## **KASANO TAYO NGA US-USAREN TI REBOLUSYONARYO A DUAN A TAKTIKA ITI PANNAKISANGO ITI ELEKSYON?**

Tunggal panawen ti eleksyon, pakpakaroen pay dagiti reaksyonaryo ken repormista dagiti propaganda da tapno allilawen ti umili ken awisen iti panagsuko ken parlamentarismo dagiti rebolusyonaryo a pwersa. Rumbeng a sungbatan daytoy babaen ti naregta a panangibutaktak iti reaksyunaryo nga eleksyon ken dagiti reaksyunaryo a kandidato ken pwersa. Rumbeng a nalawa ken naregget a riingen ti umili iti rebolusyonaryo a pannakidangadang aglalo iti sango ti agdama a nakaro unay a krisis ti sistema a mala-kolonyal ken mala-pyudal.

Ar-aramaten ti Partido ken ti rebolusyonaryo a tignayan ti rebolusyonaryo a duan a taktika tapno gaw-aten ti nalawlaw a bilang ti umili ken kontraen ti kontra-rebolusyonaryo a duan a taktika ti kabusor a mangiparparuar a demokratiko ti eleksyon iti uneg ti agdama a sistema. Iti maysa a bangir, kunkundenaren ti Partido ken rebolusyonaryo a tignayan ti eleksyon kas reaksyunaryo ken bogus iti esensya bayat nga itantandudo ti panangiyabante iti armado a rebolusyon.



## **ANIA TI SISTEMA A PARTY-LIST?**

Iti kasumbangir na, gungundawayan ti rebolusyonaryo a tignayan dagiti oportunidad nga iluklukat ti eleksyon tapno amin a benneg a makapagpapigsa ti rebolusyonaryo a pwersa ken mapakapsot met ti reaksyunaryo a pwersa ken turay. Iyab-abante iti panawen ti eleksyon dagiti naregta ken nalawa a kampanya ti masa a mangitantandudo kadagiti pang-ekonomya ken pampulitika nga interes ti umili; ipatpatungpal ti nasaknap a propaganda ken edukasyon maipapan iti nailian-demokratiko a programa ken adyenda; patpatignayen ti kalawaan nga intar ti umili; bukbuklen ti kalawaan ken nadumaduma a tukad ti silpo ken pannakitinnulong kadagiti alyado wenno gagayyem ken kadagiti progresibo ken demokratiko a puersa; ken dadduma pay. Gungundawayan met dagiti kontradiksyon iti intar dagiti reaksyunaryo a pwersa ken kandidato tapno gudduaen ti pigsa da ken puroan dagiti napeklan ken kakaroan kaniada. Supsuportaran dagiti progresibo nga alyado a lumaok iti eleksyon. No awan ti progresibo a kandidato, mabalina suportaran ti kandidato a saan a napalalo a reaksyonaryo laban iti napeklan a reaksyunaryo.

Kalpasan ti eleksyon, itultuloy ti pannakisilpokadagitikandidatoanagayyem wenno nakatinnulong iti panawen ti eleksyon, nangabak man wenno saan. Pagdudumaen ti pannakisango kadagiti nangabak a kandidato basar iti aktwal a takder da kadagiti isyu ken pannakisango da iti rebolusyonaryo a tignayan ken umili. Kadagiti nangabak a kandidato a sinuportaran ti rebolusyonaryo a tignayan, posible nga adda dagiti mangkayat nga agtultuloy ti pannakitinnulong wenno kooperasyon ken adda met dagiti bumangir iti panaglaban iti tignayan wenno saan ket pumosisyon a nyutral. Adda met dagiti saan a sinuportaran ti rebolusyonaryo a tignayan a mangkayat iti pannakitinnulong wenno kooperasyon, pumosisyon a nyutral wenno saan ket agpakaro pay kadagiti kontra-rebolusyonaryo nga aramid.

Sinnoman dagiti mabotosan a lokal nga upisyal, sangoen dagiti rebolusyonaryo a pwersa isuda basar iti takder ken tignay da. Uray pay itaktakder dagiti rebolusyonaryo a puersa dagiti rebolusyonaryo nga organo ti bileg pampulitika, agtalinaed ti pannakialyansa ken pannakigayyem kadagiti lokal nga upisyal ti reaksyunaryo a gubyrno basta makatulong iti rebolusyonaryo a tignayan.

Segun iti reaksyunaryo a Konstitusyon, ti sistema a party-list ket maysa a mekanismo tapno maikkan kano ti gundaway a maaddaan ti mangibagi dagiti sektor, organisasyon ken partido a "marginalized" (napadisi) ken "under-represented" (kurang wenno awan ti mangibagi) iti nababa a kapulongan ti Kongreso. Segun met laeng iti linteg ti sistema a party-list, ti 20% ti kabuklan a bilang dagiti representante iti Kongreso ket maited para kadagiti representante ti party-list, ken awan ti partido a mabalina mang-iggem iti nasurok tallo a pwesto. Daytoy a sistema ti mangited ti gundaway tapno makaala ti pwesto iti Kongreso dagiti babassit a partido.

Iti esensya, ti sistema a party-list ket panag-akseptar ti reaksyunaryo a gubyrno a ti Kongreso ket monopolisado dagiti dadakkel a tradisyunal a partido a mangibagbagi iti interes dagiti agturturay a dadakkel a burgesya kumprador ken apo't daga a mangbukbukel iti maysa a porsiyento laeng ti populasyon. Isunga iti sistema a party-list, saan pulos a maaddaan ti pudno ken naan-anay a representasyon dagiti marigrigat ken "marginalized" no ikumpara kadagiti dadakkel a partido gaputa inggana 20% laeng ti pwesto iti nababa a kongreso ti maited para iti party-list. Ti 80% ket adda kadagiti dadakkel a tradisyunal a partido dagiti agturturay a dasig. Awan met laeng ti pwesto a maited para iti representante iti Senado. Isunga ti sistema a party-list ket paset laeng ti panggep ti agturturay a dasig a mapartuat ti ilusyon nga agraraira ti demokrasya iti pagilyan, ken kasta met ti ilusyon a ti Kongreso ket mabalina pagtalkan ti umili uray no daytoy ket kontrolado dagiti agturturay a dasig. Maus-usar met laeng daytoy a pamuspusan tapno ipadisi wenno iyadayo dagiti tattao wenno grupo iti militante a dalan ti pannakidangadang.

Ngem ti sistema a party-list ket binaluktot metten dagiti pulitiko ken pampulitika a partido nga adda iti turay. Kadagiti napalabas nga eleksyon, dagiti dinastiya ken dadduma pay nga oportunistika ken agum a pulitiko ket nangbukel ti kanya-kanya a party-list nga organisasyon tapno mapalawa pay ti tengngel da a bileg pampulitika. Kaspangarigan ket ti ADDA a binukel dagiti Singson iti Ilocos



## ANIA DAGITI REBBENGEN ITI PANAWEN TI ELEKSYON?

Sur, ti Abono dagiti Ortega ken Estrella ti La Union ken Pangasinan, ken ti ANAC-IP dagiti Dy ti Isabela. Idi eleksyon ti 2013, pamarang laeng a diniskwalipika ti Comelec dagiti party-list a dagiti pannakabagi ken ibagbagian da kano ket saan a marginalized ngem saan a nadiskwalipika ti AKBAYAN a paseten idi ti agari-ari a bunggoy ni Aquino, napinget a mangsalsalagnib kadaytoy ken makakubkobra ti dakkel a pondo ken dadduma pay a benepisyong manipud iti pannakaipuesto. Ken idi eleksyon 2016 ket inaprobaranen ti korte suprema nga uray dagiti dadakkel ken adda iti turay a partido pulitikal ket mabalin nga agpataray ti bukod da a party-list nga organisasyon.

Kabayatan na, madandanagan ti reaksyunaryo a gubyrno kadagiti progresibo a party-list isu a nadumaduma ti us-usarenda a pamuspusan tapno madiskwalipika dagitoy. Malaksid iti awan sarday a pamerperdi, linapdan da ti akreditasyon dagiti party list a nalatak a sumupsupiat iti agdama a rehimen.

Husto laeng ti panangbukel kadagiti progresibo a pampulitika a partido (nasaklaw a pampulitika a partido wenno party-list) a mangitandudo kadagiti asug ken kiddaw ti nalawa a masa ken nakabase ken agal-ala ti pigsa manipud iti organisadong a base a masa dagiti progresibo a pwersa. Mas mapapigsa pay daytoy iti pannakitinnulong iti dadduma pay a pampulitika a pwersa ken makaisyangkat ti elektoral a pannakidangadang tapno madanon ti dakdakkel a bilang ti masa.

Kadagiti napalabas nga eleksyon, pimmaset ken napangabak ti mano a progresibo a party-list. Daytoy ket iti bangir ti panagranggas, pammutbuteng, pamerperdi ken panagsaur ti militar, Comelec ken dadduma pay a makinarya ti reaksyunaryo nga estado. Babaen kadagiti progresibo a representante iti Kongreso, iti maysa a bangir ket mabaelan a maibutaktak ti aso-aso ken kontra-umili a galad kangrunaan ti paksyon dagiti agar-ari a dasig nga adda iti pwesto kasta met ti intero nga agar-ari a sistema. Iti bangir na ket maipopropaganda ti nailian-demokratiko nga adyenda. Mairakurak dagiti nainkalintegang a reklamo ken kiddaw ti umili.



Paborable unay ti sitwasyon tapno nasaknap a maibutaktak ti bulok a sistema nga elektroral ken ti kabuklan nga agar-ari a sistema iti panawen ti eleksyon. Kasta met a paborable unay ti sitwasyon tapno iyabante ti tignayan ti masa nga anti-imperyalista, anti-pyudal ken anti-pasista ken ipasaknap ti nailian-demokratiko a linya. Dagiti rebbengen a rumbeng nga ipatungpal iti panawen ti eleksyon ket dagiti sumaganad:

**1** Iyabante ti elektoral a kampanya nga addaan galad a tignayan ti masa. Manipud kadagiti nakatakder nga organisasyon ti masa, agpataud ti adu a boluntir a mangbukel kadagiti tim ken grupo ti kampanyador para iti baro a pulitika.

**2** Ibutaktak ti reaksyunaryo a kagagalad ti eleksyon. Riingen ti nalawa a masa iti pakasapulan ti panangiyabante ti armado a rebolusyon kas kakaisuna a wagas a mangted ti dalan para iti pudnog a panagbalbaliw ti gimong.


**3** Nairot nga isilpo iti elektoral a kampanya ti panangisayangkat kadagiti tukad tipak, munisipal, inter-munisipal, probinsyal wenno nangatangato pay a tignay masa tapno iyabante dagiti anti-imperyalista, anti-pyudal ken anti-pasista a pannakidangadang ti umili. Iyabante dagiti pannakidangadang ti masa para kadagiti basaran a kiddaw ken isyu ti umili.

a. Iyabante dagiti pannakidangadang ti masa laban iti naduma-duma a pyudal ken mala-pyudal a panaggundaway. Iturong ti laban kangrunaan kadagiti kandidato nga apo't daga, ahente dagiti imperyalista nga agri-korporasyon, usurero ken trader.

b. Singiren ti naan-anay a serbisyo a relief and rehabilitation para kadagiti nadidigra iti bagyo nga Ompong ken Rosita kadagiti kandidato nga agdama nga adda iti turay ken dagiti ahensya ti gubyrno.

c. Agisayangkat kadagiti protesta laban iti militarisasyon ken panaglabsing iti karbengan tao. Ibutaktak ken laksiden dagiti kandidato a kangrunaan a rekruter ti CPLA ken dadduma pay nga armado a grupo.

d. Ilaban ti karbengan dagiti nailian a minorya iti ansestral a daga. Ilaban ti



karbengan para iti bukod a pangngeddeng ken ti pudno a pangrehiyon nga awtonomya kas porma na daytoy. Ibutaktak dagiti pulitiko a mangitantandudo iti peke nga awtonomya.

e. Labanan dagiti kumpanya ken proyekto iti panagminas ken enerhiya a mangag-agaw iti daga ken mamerperdi iti agrikultura, il-ili ken aglawlaw. Ibutaktak dagiti kandidato a mangsupsuporta ditoy ken ikampanya a saan da a mabutosan.

f. Ilaban dagiti demokratiko a kiddaw ti nadumaduma a sektor.

i. Gibusan ti kontraktwalisasyon. Ingato ti sweldo dagiti mangmanged. Ilaksid dagiti kandidato a mangitantandudo iti kontraktwalisasyon.

ii. Ingato ti sweldo dagiti titser ken empleyado ti gubyrno

iii. Libre a tuition para kadagiti estudyante ti kolehiyo.

g. Labanan ti panagngato ti presyo ti lana ken gasolina ken dadduma pay a basaran a kasapulan.

h. ken dadduma pay

**4** Isayangkat ti naregta a propaganda ken edukasyon maipapan iti nailian-demokratiko nga adyenda ken ti nailian-demokratiko a rebolusyon.

**5** Isayangkat dagiti kampanya nga edukasyon iti Ababa a Kurso iti Gimong ken Rebolusyon A Pilipino (AKGRP)

ken dagiti espesyal a kurso a pangmasa. Isayangkat ti naregta a panang-ahita ken propaganda a mangisilpo kadagiti partikular nga isyu ken kiddaw ti masa iti kabuklan a linya ti demokratiko a rebolusyon ti umili.

**6** Mangala ti adu a benepisyo para iti masa iti pannakisilpo kadagiti kandidato a mabalin a suportaran iti nadumaduma a wagas wenno kadagiti mabalin a taktikal a kaalyado. Kumbinsiren dagiti kandidato a suportaran da dagiti basaran nga interes ken pag-imbagan dagiti masa. Kas pangarigan ditoy dagiti irigasyon, pagbilagan ti pagay, dagiti pang-agrikultura a makina ken ayup a pangtalon, dadduma pay a ramramit a pangtalon, rangtay, kalsada iti baryo, botika ti baryo ken dadduma pay.

**7** Mulat nga isigurado a dagiti balligi dagiti tignay masa ket maitransporma agturong kadagiti konkreto a boto para kadagiti progresibo a kandidato ken party-list ken kadagiti gagayyem a pulitiko a saan unay a reaksyunaryo.

**8** Itakder ti kalawaan a network, pannakisilpo ken pannakigayyem iti kaaduan nga alyado para iti nadumaduma a tukad ken/wenno wagas ti napateg a panagtinnulong.

**9** Ag-urnong ti pinansyal ken materyal a suporta para iti rebolusyonaryo a tignayan ken suporta kadagiti progresibo a partido ken kandidato.

**10** Ibutaktak ken labanan dagiti panangliplipit ken pamutbuteng iti masa iti panawen ti eleksyon kasta met dagiti panagsaur iti panagbilang ti boto.

**11** Apiten dagiti balligi iti elektoral a kampanya tapno palawaen ken patibkeren ti base a masa ken ti kameng ti Partido iti kaaw-awayan ken syudad. Buklen, palawaen ken ingato ti tukad dagiti rebolusyonaryo nga organisasyon ti masa ken OKP, kasta met dagiti ligal nga organisasyon ti masa.





Iti kabuklan, mas napateg pay ngem iti pannakidangadang nga elektoral ti panangiyabante ti tignayan a masa iti panawen ti elektoral a kampanya – dagiti pannakidangadang ken mobilisasyon a masa a mangitantandudo kadagiti isyu ken kiddaw ti umili, dagiti kampanya nga edukasyon iti intar da ken ti panangitakder kadagiti organisasyon ti masa a mangreppet kadakuada para kadagiti sumaruno pay a laban.

Kabayatan na, agtultuloy dagiti taktikal nga opensiba ti Bagong Hukbong Bayan iti panawen sakbay, bayat nga irusrussuat ken kalpasan ti eleksyon tapno biraen ti AFP, PNP ken dagiti paramilitar a pwera ken nairut nga ipakita ken iwaragawag a REBOLUSYON, SAAN NGA ELEKSYON! ti laeng makaipatakder ti maysa a pagilian a pudno a narang-ay, nainkappiaan, progresibo ken demokratiko. ✊

